

Sa gherra de sa limba

Orogun, annu 2051. Proet finas oe supra s'Ufitziu de Normalizatzione Limbistica, in s'otavu pianu de s'Universidade "Neriorca Solbac", e sos guttios de abba si frimmant in s'ispriccu nigheddu de sas ventanas fotovoltaicas. Mi borto a s'ateru chirru a legher su cartellu in polisupplene chi retratat s'urtimu atoviu fattu a Siralak, su e nove atovios in cuss'annu dae parte de sa Cuarta Commissione pro s'Istandard Limbisticu. Ateros tempos s'annu coladu...e,naramus, finas bellos. Ateros tempos s'annu 2050 cando su Dipartimentu de sa Pseudoidentidade de sa Regione Belleautonoma nos cunsentiat galu de fagher sa videocunferentzia dae domo nostra chene deper pigare una proctonvettura a idrozenu. Annu de ammentare ca est propiu tando chi Sa Gherra de sa Limba est accabbada, pilu pilu propiu cando totu pariat ismarridu. Est cussu chi cheriat sa zente, chi s'isbetavant sos politicos, chi pregavant sos ecclesiasticos, e a pagu a pagu, abellu abellu a sa fine sa Gherra de sa Limba ch'est accabbada.

Totu fut comintzadu deghe lustros faghet, cando dae sa prima proposta de LSU si fut coladu a s'evoluzione prus democratica de Limba de Mesania, chi aviat chircadu de acumentare zente mala a appaghiare. E totu che pariat assentadu. Ma in cussos annos sa zente e sos politicos pessavant a ateras cosas e propiu non ressessiant a cumprendere de ite si fut chistionande. Zente mala a accumentare fut, e in su mintre su partidu CCCB(no est carchi cosa de Russia, est Chentu Concas Chentu Berritas) comintzavat a collire votos e votos in cada angrone de s'isula promitinde a manu manca e a manu deretta soluziones prus codumas ma chene ispera, e sa Gherra de sa Limba pastinavat odiu e goddiat innorantzia. Deghe annos apustis un'omine benniu dae sa Terra de Nord-Est, aviat cussizadu a su Governadore Belleautonomu nostru benniu dae su Continente de Nord-Ovest ma inditadu dae su Mannu Mannale de s'Isula de su Mare Fritu de chircare de fagher accabbare una Gherra chi non serbiat a nudda: non ochidiat a nemos, non destruiat domos, non bisonzavat de armas e non donavat mancu un'istiddia de oro nigheddu, a parte carchi litru de inchiostro chi nessunu prus manizavat. Ite gherra depiat esseser cussa? Gante isse de limba non cumprendiat nudda e de Identidade nde l'affutiat galu prus pagu. E tando po Decretu Regionogovernativu aviat obligadu totus a chistionare in Asinaresu, gasi si nemos fut cuntentu de sa Politica Limbistica a su mancu teniat carchi motivu pro lu fagher. Ma bidu chi in Asinara no istavat nemos a parte carchi poleddu, mancarì si medas ischiant orrochinare, apustis de bint'annos fut torrada a essire a campu sa Limba de sa terra de mesu. Intr'e mesu sa zente ampaniavat s'urtima gherra in sa televisione thailandesa(belle tottus c'aviant imparadu cussu dialetto gasi ladinu), mandigavat s'indittu novu de su McJanas, mescamente sa "Boddalight" e sas "Freesebadas", e galu non cumprendiat a ite serbiat cussu Istandard e cussas peleas. Calicunu sa LDM dd'aviat retzida comente carchi cosa de vonu, chi serbiat e chi pariat zusta...emmo...eja...però...si...ma....Ma non andavat vene naravant ateros. E dae tando ateras tres Commissiones ant chircadu s'Istandard Zustu, a bortas essiat una cosa nova, ateras bortas naschiat carchi Frankenstein Limbisticu ateras galu si torravat a sa LDM ma mai beniat atzetada ca in su Guvernu nostru bi fut semper calicunu de su partidu CCCB, e si sighiat a chistionare, a briare, a inzurare in nd'una Gherra chi pariat non depiat accabbare mai.

Totu custu pro ateros bint'annos.

A sa fine su partidu DCDB(Deghe Concas Deghe Berritas, ca in su mintre si furint ispagonzados) aviat agatadu una soluzione prus zusta de sa Limba de Mesania, sa LCD (sigla nova in nd'una isterrida de propostas chi pariant prus drogas o maladies chi no ateru: LSU,LDM,LCD,LSD,LLL,L09) connota menzus comente Limba Cada Die. Una proposta zusta chi aviat istetiu accumentadu a totus e fattu accabbare sa Gherra de sa Limba, proposta in s'otavu atoviu de sa Cuarta Commissione su degheotto de lampadas de su 2050. Una proposta simple, mancarì si non totus sas cosas simples sunt sas mengius. E custu fut s'arrexonamentu: bidu chi sos

Comunes furint 366 (377 furint in su 2004 ma undighi si che furint derruidos apustis de sa Ganamanna) bastavat a fagher Limba Ufitziale sa limba de una bidida pro una die! Cada variante rappresentada e cadiunu cuntentu. Gasi su bindighi de Sant'Andria beniat connota comente sa die de Doreddu, su deghe de Austu sa die de Moguronis e gasi sighinde. Su Governadore novu no ischiat a ite serviat cussa limba gasi antiga, pessavat a carchi zogu novu e l'aviat atzetà. Pro fagher torrare sos contos sa bidida prus minore depiat solu seperare de esser bisestile e fagher chistionare sa limba propia cada battor annos o sinono esser destruida cun nd'una simple Bushbomba. Ma in s'urtima riunione, su de nove atovios de sa Cuarta Commissione, su deghennove de Capudanni de su 2050 aviamus cumpresu chi sa proposta fut perigulosa ca podiat batire estremismos malos de issolvere: si timiat chi podiat nascher una LCP, una Limba Cada Pessone e pro custu aviamus votadu a maggiorantzia pro torrare a sa fentomada Limba de Mesania.

Como sezis pessande chi sa Gherra de sa Limba ch'est accabbada su deghennove de Capudanni 2050 ca che aviamus agatadu s'Istandard.

E imbetzes...e imbetzes nono. A dolumannu sa Gherra est accabbada ca non bi fut prus sa Limba o a la narrer menzus non bi furint prus pessones chi la chistionavant. Non bi fut prus su *casus belli*. Tropu tempus fut coladu. In su de nove atovios de sa Cuarta Commissione, pessadebos vois, fumis solamente in duos. Ma su mese coladu su collega e amigu Orxus si ch'est andadu e como imparat a sos piseddos sa Mirabolimba de sa terra de su Sole Creschente. Tropu tempus fut coladu, nudda aviamus fattu pro normalizzare sa Limba Nostra, non nos acatavamus de su chi capitavat afurriu nostru, sempre tancados a murrunzare una soluzione chi che teniavamus zai dae chimbant'annos.

E como a mene mi toccat chistionare cun nd'unu computer chi s'ammentat totus sas allegas, ma sunt gasi fritas, gasi bodias cando non si tenet prus a nemos pro chistionare.

E como...como ch'est tardu, so istracu de iscrriere in custa limba, mi dolent sos ocros, sunt ruvios e ufrados, mi faghet pranghere. Tocca chi ando a mi biere Sardegna Canta in ingresu, va!